

Jalai Ngator Pendiau

JAKO AJAR ARI SURAT ALLAH TAALA

*Awak ka Pendiau kita baka ti patut ka orang ti
arap ka Injil ti ditusi Isa Almesih.*

Pilipai 1 : 27.



Scripture Gift Mission

ECCLESTON STREET, LONDON, S.W.1

Printed in England

ATOR AJAR TI DALAM SURAT TU

	DAUN
PUN JAKO AJAR : Sapa orang nya ti rindu diau manah ?	5

PENDIAU KITAI DALAM RUMAH KITAI-EMPU

1. Sambiang tiap hari	7
2. Pasal nikah	8
3. Pasal ngintu diri tuchi	10
4. Apai indai enggau anak sida	12

JALAI NGATOR PENDIAU DIRI

1. Pasal makai enggau ngirup	14
2. Pasal gari	15
3. Pasal penuchi	16
4. Pasal jako kitai	16
5. Pasal pemedis enggau penyakit	18

JALAI NGATOR PENDIAU DIRI ENGGAU ORANG BUKAI

1. Sida ti megai kitai	21
2. Pasal bekerja	22
3. Sida ti Tuan enggau kapala orang	23
4. Pasal duit enggau modal kitai	24
5. Pasal berutang enggau anak duit	27
6. Pasal bechara	27
7. Pasal orang ti ngelaban kitai	29
8. Pasal kasih ka orang enggau mla orang	30
9. Leboh kena keduuan tegal penglurus kita	31

JALAI ALLAH TAALA

1. Jalai betuai ka iya enggau nyembah iya	34
2. Pasal ngintu Hari Minggu	34
3. Pasal nyembah berala	35
4. Pasal manang enggau orang ti ngakal	36

JAKO TI DUDI : Pemati—iya nya pun jalai ti nuju pengidup ti meruan	38
--	----

PASAL SURAT TU

Samoa ajar ti dalam surat tu udah di-ambi ari surat Bible, iya nya, Surat Allah Taala. Enti ulih, patut kita ngambi Surat Allah Taala siti, lalu salalu macha iya, laban dalam surat nya Allah Taala bejako enggau samoa kitai mensia.

PUN JAKOA JAR

SAPA ORANG NYA TI RINDU DIAU MANAH ?

Allah Taala rindu ka mensia, datai ka iya mri Anak tunggal iya, ngambi ka samoan orang ti arap ka iya enda lalu mati, utang bulih idup meruan. Orang ti arap ka Anak nya bisa idup ti meruan; orang ti enda ngasi ka Anak nya nadai meda pengidup, utang anu Allah Taala meruan enggau iya. . . . Nyadi tu meh reti pengidup ti meruan, sida nemu nuan, Petara siko aja ti endang bendar; nemu Isa Almesih mega ti di-asoh nuan.

* * *

Baka tu Allah Taala nentu ka pengindru iya ka kitai; leboh kitai agi orang ti bedosa, Almesih mati awak ka ngidup ka kitai. . . . Nyadi baka samoan mensia diletak kena ukum laban penyalah orang siko; baka nya mega olah kerja siko orang ti lurus pengampun enggau pengidup dibri ka samoan mensia.

Nyadi pengindru Almesih ti mujor ati kitai; laban tu runding kami, siko udah mati tegal samoan, nya alai pemati iya dirunding ka pemati samoan sida; nyadi iya mati tegal samoan awak ka sida tau idup enda berunding ka diriempu aja, utang betuai ka iya ti udah mati tegal sida, lalu pulai idup baru tegal sida.

* * *

Aku udah kena regang sama enggau Almesih; taja baka nya aku agi idup, utang ukai aku ti idup, tang Almesih ti idup dalam aku : aku idup diatu olah aku arap ka Anak Allah Taala, ti rindu ka aku, lalu udah mri diriempu tegal aku.

Nyadi kuasa iya, ti endang kuasa Petara, udah dibri ka kitai kena nulong kitai idup lalu diau lurus, olah kitai nemu iya ti udah ngumbai kitai ngagai pemanah enggau pemadas iyaempu. Olah iya mega berkat ti disemaiyah Allah Taala tau disambut kitai, awak ka olah utai ti disemaiyah iya mri ka kitai, kitai tau saum dalam

pemisi enggau kuasa Allah Taala, ti udah lepas ka kitai ari penyai ti bisi dalam dunya tu olih ingin mensia ti jai. Amai, keba nya anang enda kita rajin dalam samoan utai; awak ka pengarap kitai numboh ka pemadas; serta enggau pemadas kita, tambah ka penemu; awak ka penemu nya numboh ka ati ti nemu nagang diri; ati ti nemu nagang diri patut numboh ka ati liat; ati liat patut nambah ka ati ti nangi ka Allah Taala serta rindu ka menyadi kita, lalu ati ti rindu ka menyadi patut numboh ka pengindru baka pengindru Almesih. Nyadi enti samoan utai nya bisa nambah-menambah dalam ati kita, iya tau ngasoh kita nyadi bendar lalu mansang nemu Isa Almesih, Tuhan kitai.

* * *

Upah dosa, nya pemati; tang utai ti dibri Allah Taala ka kitai nya idup ti meruan, olih Isa Almesih, Tuhan kitai.

Masmur 34 : 12. John 3 : 16, 36; 17 : 3. Roma 5 : 8, 18. 2 Korinth 5 : 14, 15. Galatia 2 : 20. 2 Peter 1 : 3-8. Roma 6 : 23.

PENDIAU KITAI DALAM RUMAH KITAI-EMPU

*Enti enda Tuhan Allah ti ngaga rumah,
nadai tunga kerja orang ti ngaga iya.*

Masmur 127 : 1.

i. SAMBIANG TIAP HARI

Bacha Surat Allah Taala

Giga olih kita surat Allah Taala, lalu macha iya.

* * *

Jako Tuhan baka lampu ti ngiring kaki aku; iya nerang ka jalai aku.

Nyadi sida orang Beria nyambut jako enggau ati baroh, lalu ngabas surat Allah Taala tiap hari.

Surat Allah Taala ti kudus tau ngasoh nuan bepenemu lalu bulih salamat, olih nuan arap ka Isa Almesih. Samoa surat ti ari Allah Taala beguna kena ngajar, kena ngerara utai ti salah, kena madah ka utai ti ngena; ngambi ka anembia Allah Taala tau mansang nyadi pemedu badas, enda kurang ajar pasal kerja ti patut digaga iya.

Isaiah 34 : 16. Masmur 119 : 105. Kerja Rasul 17 : 11. 2 Timoti 3 : 15-17.

Jako tampong : Kolosi 3 : 16.

Sampi enggau Puji

Aku ka muji nuan Tuhan, ti Petara aku, ti Rajah aku:
Genap hari aku ka muji nuan;
Lalu muji nama Tuhan berari-ari.

* * *

Tumu pagi Tuhan ka ninga munyi nyawa aku;
Tumu pagi aku ka ngator sambiang aku, lalu bejaga.

Nyadi pagi siti, agi dini hari, Isa angkat, pansut
ari rumah lalu bejalai ngagai endor ti sunyi,
besambiang dia.

Awak ka ati kita penoh oih Roh Alkudus; leboh
bejako enggau diri sama diri nelah masmurng enggau
pantun enggau lagu ti di-ajar Roh; nyanyi lalu ngelagu
ka Tuhan dalam ati; nyadi salalu muji Allah Taala ti
apai kitai, laban samoan utai ti dibri ka kitai, dalam
nama Isa Alemsih, Tuhan kitai.

Anang enda kita enggau leboh orang begempuru
besambiang, baka skeda orang enda enggau, utang
ngring ka diri sama diri kita.

Masmur 145 : 1, 2; 5 : 3. Mark 1 : 35. Epesus 5 : 18-20.
Ibrani 10 : 25.

Jako tampong : Luke 2 : 37; 11 : 1. Kerja Rasul
8 : 26-39; 10 : 2, 30. Pilipai 4 : 6.

2. PASAL NIKAH

Jalai Nikah Di-ator Allah Taala

Ko Tuhan Allah Taala : Enda patut orang lelaki
diawu kadiri; aku ka ngaga penyaup ka iya. Nya alai
iya ti lelaki ka ninggal ka apai indai iya lalu diau enggau
bini iya, lalu saduai nya ka nyadi tuboh siti aja.

Ko jako Tuhan Isa : Nadai kita udah macha, iya ti
ngaga sida ari mula-mula, ngaga sida lelaki enggau
indu, udah bejako, Laban tegal tu orang lelaki ninggal
ka apai indai iya, lalu begulai enggau bini iya: lalu
saduai nya nyadi sa-tuboh? Nyadi nadai agi saduai
nya betuboh dua, utang satuboh. Keba nya, nya ti
udah ditampil Allah Taala anang mensia nyarak.

Genesis 2 : 18, 24. Matthew 19 : 4-6.

Leboh ngiga lelaki tau ka bini

Anang saum enggau sida ti enda arap; baka jelu ti
besai enda tau saum kongkong enggau jelu ti mit: baka
ni pengulurus tau begulai enggau penyai? Baka ni
penerang tau begulai enggau pemetang?

Nyadi indu ti manah endang baka makota ka
lelaki iva.

Bini ti jimat endang dibri Allah Taala.

2 Korinth 6 : 14, 15. Proverbs 12 : 4; 19 : 14.

Indu enda tau enda madah ka diri deka

Sida ngambi Rebecca, lalu nanya iya, ko sida, Deka
nuan jadi ka orang tu? Disaut iya, Deka aku.

Genesis 24 : 58.

Pendiau sida ti nyadi laki bini

Kita ti lelaki rindu ka bini kita, baka Almesih rindu
ka eklisia iya, lalu mri nyawa tegal iya. Baka nya
mega patut sida lelaki rindu ka bini sida, baka sida
rindu ka tuboh sidaempu.

Awak ka lelaki mri ka bini naka ti patut, pia mega
bini ka laki. Bini nadai kuasa atas tuboh diriempu,
utang laki iya ti bisa kuasa : pia mega laki nadai kuasa
atas tuboh diriempu, utang bini iya. Anang enda
begulai enggau diri sama diri, enti enda sajako, enda
lama, ngambi ka kita bisa hari sambiang, udah nya
begulai baru, enggai ka Sitan nguji kita laban kita enda
tetangka ka diri.

Kita ti indu ti bisa laki; tundok ka laki kita, awak
ka, taja skeda sida enda niteh ka jako (Allah Taala),
sida ti nadai jako tau ditangkap oih pemadas pendiau
bini sida, leboh sida meda pendiau kita ti tuchi, ti
nangi.

Baka nya mega kita lelaki ti bisa bini, begulai enggau
bini kita enggau runding ti manah baka ti patut;
bebasa ka sida ti indu ti lemi agi ari kita, tang sida sama
enggau kita bulih berkat pengidup, ngambi ka sambiang
kita enda kena kachau.

Epesus 5 : 25, 28. 1 Korinth 7 : 3-5. 1 Peter 3 : 1, 2;
3 : 7.

Jako tampong : Kolosi 3 : 18, 19.

Jalai sida indu ti tuai tau nulong indu ti biak

Indu ti nyau tuai patut ngajar utai ti badas, ngambi ka sida tau ngajar sida indu ti biak rindu ka laki sidaempu, lalu rindu ka anak sida mega; ajar sida nyadi jimat, tuchi, rajin ngintu rumah, nelap, nundok ka laki sida.

Titus 2 : 3-5.

Pasal indu balu

Ko jako Allah Taala : Anang sakali-kali beduan sida indu balu, tau ka anak patu.

Indu ti belaki enda tau belaki baru sakumbang laki iya agi idup; utang enti laki iya udah mati, iya tau belaki enggau barang orang ti ka deka iya, enti iya udah masok Kristian.

Ko Allah Taala : Aku ka datai ngagai kita lalu mai kita bechara; lalu aku ka ngelaban sida ti beduan orang balu enggau anak patu.

Exodus 22 : 22. 1 Korinth 7 : 39. Malakai 3 : 5.

Jako tampong : Mark 10 : 11, 12. John 2 : 1-11. 1 Korinth 7 : 12-16. Galatia 3 : 27, 28. Epesus 5 : 22-24. 1 Timoti 5 : 8.

3. PASAL NGINTU DIRI TUCHI

Ko Tuhan Isa : Beberkat sida ti tuchi ati, laban sida ka meda Allah Taala.

* * *

Rindu kita ka bini nuanempu. Mulut indu bukai pandai ngelakar; dulu jako iya manis baka ai manyi, lalu lichin baka minyak, utang dudi iya pait baka rachun, lalu tajam baka pedang; kaki iya tengah jalai pemati.

Awak ka adat belaki bebini dipebasa ka olih samoan orang, lalu kibong orang di-intu tuchi; laban Allah Taala ka ngukum orang ti bambai, ti butang.

Ko Tuhan Isa: Ari ati orang detai pragam jai, pemunoh orang, pemutang, bambai, penchuri, saksi bula, jako sumpah; nyadi utai nya ti ngama ka orang. Ko iya mega : Tiap orang ti meda indu lalu salah ati enggau iya, udah butang enggau indu nya dalam ati iya. Nyadi enti mata nuan mai nuan bepenyalah, tanggal ka iya, lalu buai ari nuan; laban nyadi ka untong nuan enti siti utai nyau ari tuboh nuan, lalu enda samoan tuboh nuan dibuai kadalam api neraka.

* * *

Anang kita enda mereti : orang ti bambai, orang ti nyembah berala, orang pemutang, orang ti enggai nagang diri, tang bekerka jai enggau pangan diri, orang pemabok, enggau orang to baka nya, enda tau bulih pesaka dalam printah Allah Taala. Kati enda kita numu tuboh kita endang saum enggau Almesih? Enda kita nemu orang ti begulai enggau indu sundal nyadi saum enggau indu nya, saduai nyadi tuboh siti? Kalaung ka dosa bambai. Tuboh kita udah nyadi rumah Roh Alkudus, iya diau dalam kita, iya dibri Allah Taala ka kita. Nyadi kita ukai enggi kitaempu, laban utai ti besai rega udah dibri kena nimbang kita; keba nya awak ka tuboh kita ti tuchi muji Allah Taala.

* * *

Aram kitai diau lurus baka ti bejalai tawas; anang enggau main ti jai enggau mabok, anang enggau bekendak enggau kerja jai, anang enggau belya enggau kapapas, utang rasok ka pendiau Tuhan Isa Almesih; anang ngiga jalai niteh ka ingin tuboh kita.

Nyadi barang utai ti ditabor orang, nya meh ti diketau iya; iya ti naboh ka ingin tuboh iya, ari ingin tuboh iya ka ngetau pengrusak; iya ti nabor utai Roh, ari Roh nya iya ka ngetau pengidup ti meruan.

Matthew 5 : 8. Proverbs 5 : 18, 3-5. Ibrani 13 : 4. Matthew 15 : 19, 20; 5 : 28, 29. 1 Korinth 6 : 9, 10, 15, 16, 18-20. Roma 13 : 13, 14. Galatia 6 : 7, 8.

Jako tampong : Mark 6 : 17-28. Kolosi 3 : 5.

Pasal Sarak

Ko Tuhan Isa : Barang orang ti muai bini iya lalu jadi ka indu bukai, iya butang, iya salah ngelaban bini iya. Enti indu nya mega muai laki iva, lalu jadi ka lelaki bukai, iya butang.

* * *

Ko Rasul S. Paul : Tu pesan aku enggau orang ti nikah; ukai aku ti ngeletak pesan, utang Tuhan : Anang bini sarak enggau laki iya (utang enti iya sarak awak ka iya meruan enda belaki, sakalika iya pulai baru ngagai laki iya); lalu laki anang iya muai bini iya.

Mark 10 : 11, 12. 1 Korinth 7 : 10, 11.

Jako tampong : Matthew 19 : 3-9.

4. APAI INDAI ENGGAU ANAK SIDA

*Ingat, anak endang pesaka ti dibri Tuhan ka orang :
Nyadi samoan anak endang upah ti dibri Tuhan Allah.*

Masmur 127 : 3.

Patut sida anak kena ajar

Ajar anembiak niteh ka adat ti patut dipegai iya; nyadi lebok iya nyau besai iya enggai ngelengka iya.

Ko Allah Taala : Taroh jako aku dalam ati kita, lalu madah ka iya ngagai anak kita. Bekenang enggau sida pasal jako aku, lebok kita dudok di rumah, lebok kita bejalai, lebok kita gali, enggau lebok kita angkat mega.

Ko Tuhan Isa : Barang sapa ka nyambut siko anak dalam nama aku, iya nyambut aku mega; utang barang sapa ti ka ngasoh tetrap siko anak mit ti arap ka aku, beguna agi ka iya enti batu kisar sigi ditating ka di rekong iya, lalu ditengelam ka di tengah tasik.

Ko iya mega : Lak ka sida anembiak ti mit ngagai aku; anang muru sida, laban orang ti baka nya ti tau bempu printah Allah Taala. Nyadi iya mrap sida, iya ngengkah ka jari iya datas sida lalu merkat ka sida.

* * *

Nyadi orang ti enggai ngajar anak iya nadai tentu rindu ka iya, utang orang ti rindu ka anak iya enggai enda nganu iya lebok patut.

Kita ti bisi anak anang ngasoh anak kita ringat ngapa; utang ngibun sida, ngukum sida, lalu ngajar sida baka ti patut orang Kristian.

Nyadi sida anak Elai enda ngintu adat Allah Taala. Penyalah saduai besai ti digaga sida di moa Allah Taala. Nya alai, ko Allah Taala, aku ka ngukum rumah Elai laban iya bisa udah nemu penyai saduai; sigi penyalah sidaempu ti udah mai ukum aku ninggang sida, utang Elai enda ngerara sida, enda nagang sida.

Proverbs 22 : 6. Deuteronomy 11 : 18, 19. Matthew 18 : 5, 6. Mark 10 : 14, 16. Proverbs 13 : 24. Epesus 6 : 4. 1 Samuel 2 : 12, 17; 3 : 11, 13.

Pasal utai ti patut digaga anembiak

Kita anembiak, ngasi ka apai indai kita ti arap ka Tuhan, laban kerja nya sigi ngena. Bebas ka apai indai, ngambi ka kita bulih penglantang, lalu umor kita panjai di dunya tu.

Epesus 6 : 1-3.

Jako tampong : Mark 10 : 13-16. Luke 2 : 41-52.
2 Timoti 1 : 5; 3 : 15.

JALAI NGATOR PENDIAU DIRI

Dalam samoan kerja kita, ingat ka iya (Allah Taala).
Proverbs 3 : 6.

1. PASAL MAKAI ENGGAU NGIRUP

Allah Taala ti mri samoan utai

Nuan samengat aku, anang enda muji Tuhan Allah. Iya numboh ka rumput ka pemakai jelu, enggau engkayu ka guna mensia, awak ka orang tau bulih pemakai ari tanah.

Apai kami ti di serga, bri ka kami saharitu pengumbas pemakai kami.

Ko Tuhan Isa ngajar kitai : Keba nya anang beati irau bejako, Nama ka di-empa kitai? sakalika, Nama ka di-irup kitai? Apai kita ti di serga nemu kita beguna ka utai nya.

Tau ka kita makai, tau ka kita ngirup, tau ka nama-nama digaga kita, gaga samoan awak ka ngemesai ka Allah Taala.

Masmur 104 : 1, 14. Matthew 6 : 9, 11, 31, 32. 1 Korinth 10 : 31.

Utai ti tau dipakai

Ko Tuhan Isa : Samoa utai ti ari luar ti tama kadalam tuboh mensia enda tau ngasoh iya kamah, laban utai nya nadai tama kadalam ati iya, mina kadalam prut iya. Nyadi oih jako nya iya madah ka samoan macham utai tau dipakai.

Kita anang makai utai ti dipiring ka berala, enggau utai ti enda disembilih, enggau utai ti dibunuh enda pansut darah.

Anang mabok laban ai bisa ti mai kita ngaga utai jai, utang awak ka ati kita penoh oih Roh Alkudus.

Mark 7 : 18, 19. Kerja Rasul 15 : 29. Epesus 5 : 18.
Jako tampong : Mark 7 : 20-23.

Pasal Bepassa

Ko Allah Taala : Tu jalai aku ngasoh kita bepassa; Buai penyai ti masong orang, lalu idup ka sida ti kena kaduan; lepas ka orang ari barang penusah ti ninggang

iya; bagi pemakai kita enggau orang ti lapar, lalu bri alai diau ka sida ti nadai rumah. Leboh kita meda orang ti kurang gari, anang enda kasih ka iya.

Ko Tuhan Isa mega : Leboh kita bepassa, anang kita baka sida orang pengakal, bemoa tusah; laban sida malih moa diri ngambi ka dipeda mensia sida bepassa. Amai aku madah ka kita, Sida udah nyambut upah sida. Utang leboh nuan bepassa peminyak ka pala nuan lalu tempungas moa nuan, ngambi ka nuan enda dipeda mensia bepassa, utang dipeda Apai nuan ti meda utai ti enda dipeda mensia, lalu iya ka ngupah nuan.

Isaiah 58 : 6, 7. Matthew 6 : 16-18.

Anang enda mri trima kasih

Samoan utai dipakai digaga Allah Taala awak ka di-empa enggau puji oih sida ti arap nemu utai ti bendar.

Nyadi Paul ngansak samoan makai; iya lalu ngambi roti lalu mri puji ka Allah Taala di moa sida samoan; udah nya iya bedua roti nya lalu makai.

1 Timoti 4 : 3. Kerja Rasul 27 : 33, 35.
Jako tampong : Matthew 9 : 10. Mark 8 : 1-21. Luke 12 : 22-26; 15 : 2. John 6 : 1-13. Kerja Rasul 11 : 1-18.
1 Korinth 5 : 11; 8 : 4-13.

2. PASAL GARI

Allah Taala ngaga gari ari kulit jelu ka Adam saduai Awa lalu mri ka saduai.

Ko jako Tuhan Isa : Anang beati irau bejako, Enggau nama kitai ka begari? Apai kita ti di serga nemu kita beguna ka utai nya.

Anang kita ti indu bengepan enggau utai ti dipeda aja, bokti di-anyam, tau ka mas ti dipasang, tau ka gari ti dikena. Utang patut kita bengepan enggau ati baru ti dalam nyin, ati baroh, ati ti jenoh, nya baka gari ti enda tau jai; nyadi utai nya dirunding Allah Taala beguna bendar.

Genesis 3 : 21. Matthew 6 : 31, 32. 1 Peter 3 : 3, 4.
Jako tampong : Luke 12 : 27-34. 1 Timoti 2 : 8-10.

3. PASAL PENUUCHI

Sida orang bansa Livai nesah gari sida, baru sida masok rumah sambiang.

Nyadi Allah Taala mri pesan ka Musa, ko iya, Bejalai ngagai sida anembiak lalu kemas ka sida; asoh sida nuchi gari sida, laban Allah Taala ka nurun ngagai sida.

Tuboh kita udah nyadi tempat alai Roh Alkudus diau.

* * *

Dalam senyata kita enda tau enda bisa sandak siti; nyadi leboh kita ngerungkong, kita enda tau enda ngalih ka lubang lalu numbak nya ti pansut ari tuboh kita : laban Allah Taala, Petara kita, bejalai nengah tanah alai kita diau, nya alai tempat kita enda tau enda tuchi; anang iya meda utai ti kamah dia.

Nya alai laban kitai brani tama kadalam endor ti kudus, oih darah Isa, . . . awak ka kitai ngadap iya enggau ati bendar, enggau pengarap ti enda kakang, enggau ati ti di-unsai, ti nadai agi ngasi ka penyalah, enggau tuboh ti dibasu enggau ai ti tuchi.

Numbers 8 : 21, 22. Exodus 19 : 10, 11. 1 Korinth 6 : 19. Deuteronomy 23 : 13, 14. Ibrani 10 : 19, 22.
Jako tampong : 1 Korinth 3 : 17.

4. PASAL JAKO KITAI

Jaga nyawa aku, Tuhan;
Tagang mulut aku.
Masmur 141 : 3.

Nyadi jako kitai mandang ka runding ati kitai

Ko Tuhan Isa : Nyadi ari pemayoh runding ati, nya ti ditelah nyawa. Orang ti badas, ari ati iya ti badas, mansut ka jako ti badas; lalu orang ti jai, ari ati iya ti jai mansut ka jako ti jai. Nyadi ari madah ka kita, samoia jako ngapa ti ditelah mensia ka

ditanggong sida leboh hari kasmat. Laban ari jako kita, kita ka dipekena ka, lalu ari jako kita, kita ka dipesalah ka.

* * *

Enti barang orang ngumbai diri orang ti arap, lalu enda mrintah mulut diri, utang ngakal diriempu, nadai guna pengarap orang nya. Enti orang enda salah jako, nya orang ti tentu bendar, iya tau mrintah samoia tuboh iya mega.

Matthew 12 : 34-37. Jakob 1 : 26; 3 : 2.
Jako tampong : Jakob 3 : 3-10.

Baka tu patut jako kitai

Anang nelah nama Allah Taala, Petara kita, enggau jako emplita.

Ko Tuhan Isa : Anang besumpah sakali-kali. Utang awak ka jako kita nyadi pia, Amai, amai; Nadai, nadai. Anang nyalah orang, enggai ka kita dipesalah ka.

Leboh kita nyadi saksi, anang jako kita bula; anang bepekat enggau orang nyadi saksi bula.

Awak ka samoia orang lansik ninga, lobah bejako, lobah nganu.

Nyawa indu ti badas mansut ka jako ti beguna bendar; jako kasih, jako sinu ditelah iya.

Exodus 20 : 7. Matthew 5 : 34, 37; 7 : 1. Exodus 23 : 1.
Jakob 1 : 19. Proverbs 31 : 10, 26.
Jako tampong : Epesus 4 : 25. Kolosi 4 : 6. 1 Peter 3 : 10.

Pasal jako jai

Anang jako jai pasut ari nyawa kita, utang jako badas ti ngemansang ka guna orang, ti nyaup, ti ngelantang ka orang ti ninga. Buai ari kita ati ti pedis, ti nganu, ti ringat, serta enggau samoia krik enggau jako kasar, enggau samoia macham penyai.

Utang bambai, enggau kerja kamah, enggau kapapas, anang iya disebut pasal kita, laban kita endang anembiak Allah Taala; jako kamah enggau jako lap

anang, enggau jako bunga ti enda tentu anang, utang sebut jako puji.

Anang bejako bula enggau diri sama diri.

Anang nuan bejalai kia kia ngelakar orang.

Epesus 4 : 29, 31; 5 : 3, 4. Kolosi 3 : 9. Leviticus 19 : 16.

Joko tampong : 1 Korinth 6 : 10. Jakob 4 : 11-17. 1 Peter 2 : 21-23.

5. PASAL PEMEDIS ENGGAU PENYAKIT

Almesih udah marinsa tegal kita, iya ngaga teladan ka kita, awak ka kita tau miteh ka iya.

1 Peter 2 : 21.

Pemedis enggau penyakit masok dunya laban penyalah mensia

Olih kerja orang siko penyalah masok dunya; lalu laban penyalah nya pemati nyadi mega.

Samoa utai ti digaga ngasai ka permedis, baka indu ti radai, dawai ka diatu. Nyadi kitai mega merengong dalam ati diriempu, dalam kitai nganti diri di-iru nyadi anak, iya nya lebok tuboh kitai ka ditebus.

Roma 5 : 12; 8 : 22, 23.

Allah Taala iyaempu udah ngasai ka penusah

Isa Almesih, taja iya anak Allah Taala, belajar nundok olih pemarinsa ti ditat ka iya; nyadi udah iya belajar ka samoaa utai, iya nyadi pun salamat ti meruan, lalu mri nya ka samoaa orang ti ngasi ka iya.

Iyaempu orang ti udah nemu pemarinsa enggau permedis.

Ibrani 5 : 8, 9. Isaiah 53 : 3.

Iya nulong nanggong penusah kitai

Allah Taala ti ngintu kitai, ti ngring ka kitai : lebok penusah datai iya nyata bendar nyaup kitai.

Nyadi tu jako Allah Taala ti ngaga kitai : Anang takut laban aku udah nebus kita : Lebok kita bejalai nengah ai, aku ka enggau kita; lebok kita nyembrang ai ti dalam, enda ai nya ka ngampoh kita; lebok kita bejalai di tengah api, enda kita ka kena angus, enda daun api ka nganu kita.

Puji ka Allah Taala, Apai Isa Almesih Tuhan kitai, Apai ti kasih bendar, Petara ti ngring ka kitai. Iya ti nyaup kitai dalam samoaa penusah, awak ka kitai tau nyaup orang ti tusah mega, enggau penaup ti enggau kitai disaup Allah Taala. Laban baka kitai saum enggau pemarinsa Almesih, baka nya mega kitai saum enggau penyamai iya.

Nunda ka guna tuboh, baka nya pengring dibri ka kitai. Allah Taala, ti endang meruan belama-lama, ka nyadi rumah alai nuan tau diau; nyadi dibaroh nuan bisi lengan iya ti ka nanggong nuan berari.

Masmur 46 : 1. Isaiah 43 : 1, 2. 2 Korinth 1 : 3-5. Deuteronomy 33 : 25, 27.

Penusah ti ditat ka kitai di-asoh iya pulai ka untung kitai

Samoa utai ti nyadi di kitai sigi pulai ka pengung-tong dudi hari ka samoaa orang ti rindu ka Allah Taala.

Taroh iya ka pengandal besai lebok kita kena mayoh macham pengugi; olih kita nemu, enti pengarap kita di-abas, iya numboh ka penetat. Bri alai penetat tau turboh, awak ka kita nyadi badas, nyadi manah, nyadi semporna, nadai kurang dalam barang utai.

Roma 8 : 28. Jakob 1 : 2-4.

Tang penusah ti ninggang orang Kristian enda meruan lama

Penusah kitai (di dunya tu) ti enda balat amai, ti enda meruan lama, bulih ka kitai mulia ti besai agi, ti nambah-menambah, ti meruan belama-lama.

Penemu ti dipandang ka Isa Almesin ngagai anembiaik iya John. Tu jako John : Aku meda langit baru enggau dunya baru, laban langit ti dulu enggau dunya ti dulu udah nyau. Nyadi aku ninga nyawa ti inggar, ko iya, Allah Taala ka diau enggau mensia lalu iya ka begulai enggau sida; nyadi iya ka ngendas ai mata sida; nadai agi pemati, nadai agi ngulit mega, nadai agi pemedis, tau ka sabak; samoan utai ti dulu udah nyau.

2 Korinth 4 : 17. Revelation 1 : 1; 21 : 1, 3, 4.
Jako tampong : Mark 2 : 5, 11. John 16 : 20, 22. Kerja Rasul 3 : 1-10. 2 Korinth 12 : 7-10. Pilipai 3 : 8. 1 Peter 5 : 10.

JALAI NGATOR PENDIAU DIRI ENGGAU ORANG BUKAI

Asoh penampak kita tampak dipeda mensia, ngambi ka sida eda kerja kita ti badas, lalu muji Apai kita ti di serga.

Matthew 5 : 16.

I. SIDA TI MEGAI KITAI

Orang Printah

Ko Tuhan Isa, ngajar kitai : Bri ka Kaisar (iya nya Printah) utai ti enggi Kaisar, lalu mri ka Allah Taala utai ti enggi Allah Taala.

* * * * *

Awak ka tiap orang nundok ka orang ti mrintah iya, laban samoan kuasa datai ari Allah Taala, lalu sida ti megai kitai endang di-asoh Allah Taala. Nya alai orang ti ngelaban printah ngelaban letak Allah Taala; nyadi sida ti ngelaban ka kena ukum. Ukai orang ti badas, utang orang ti jai ti patut takut ka printah. Bri ka samoan orang utai ti patut; Bri pupu ka orang ti patut nyamput pupu; chukai ka orang ti nyambut chukai; kenangi ka orang ti patut dikenangi ka; bebas ka orang ti patut dipebas ka.

* * * * *

Aku ngasoh kita besambiang, mri puji, lalu minta kasih ka samoan mensia; ka sida rajah enggau samoan orang ti megai kuasa, ngambi ka kitai diau jenoh, pendiau kitai lantang, lalu kitai tau betuai ka Allah Taala lalu diau badas. Nyadi kerja ti baka nya dikarindu ka Allah Taala ti Penglepas kitai.

Matthew 22 : 21. Roma 13 : 1-3, 7. 1 Timoti 2 : 1-3.

Dalam Eklisia

Ingar ka sida ti megai kita, ti udah nusi jako Allah Taala ngagai kita; tunda ka pengarap sida mega.

Ngasi ka sida ti megai kita, lalu nundok ka sida, laban sida ti ngintu samengat kita.

Ibrani 13 : 7, 17.

Jako tampong : 1 Peter 2 : 13-17.

2. PASAL BEKERJA

Endang ator Allah Taala kitai mensia bekerja

Allah Taala ngambi orang lelaki nya (iya nya Adam) lalu ngasoh iya diau di kebun Idom lalu ngibun kebun nya.

Udah nya Allah Taala ngasoh iya ninggal ka kebun nya lalu bumai tanah, laban ari tanah iya udah di-ambi.

* * *

Mayoh orang ti ninga jako ajar Tuhan Isa alit ati; ko sida nanya diri sama diri, Ukai enda tu iya ti tukang kayu ?

* * *

Awak ka kita nguji diau enggau jimat, lalu megai pengawa diri, lalu bekerja enggau jari diri mega.

Ko jako St. Paul : Enti orang enggai bekerja, awak ka iya enda makai. Nyadi kami ninga rita pasal pendiau skeda kita ti enda tentu, sida enggai bekerja, sida ngachau orang. Nyadi kami mesan, kami ngajar orang ti baka nya dalam nama Tuhan Isa, awak ka sida bekerja lalu ngiga pemakai ngidup ka diri.

Ko iya mega : Kita nemu aku ngidup ka diriempu enggau sida ti enggau aku mega, oih kerja jari akuempu. Dalam samoan utai aku nyadi teladan ka kita, madah ka kita patut bekerja baka nya, lalu nulong orang ti enda kring.

Genesis 2 : 15; 3 : 23. Mark 6 : 2, 3. 1 Tesalonika 4 : 11. 2 Tesalonika 3 : 10-12. Kerja Rasul 20 : 34, 35.

Baka tu kitai patut ngaga pengawa kitai

Kita ti makai gaji orang, ngasi ka tuan kita dalam samoan utai; ukai laban dipeda aja, awak ka minta puji mensia, utang enggau ati bendar laban nangi ka Tuhan Isa; nyadi barang kerja ti digaga kita, gaga iya baka ti bekerja ka Tuhan Isa, ukai bekerja ka mensia, laban kita nemu Tuhan nya ka mri pesaka ka upah kita; nyadi kita sigi endang anembiaik Isa Almesih.

Nyadi orang ti bisi tuan ti arap ka Allah Taala, anang sida mantah tuan sida, laban sida nya sama menyadi; nya alai patut sida bepetuai ka sida lebih agi, laban tuan nya ti bulih untong ari kerja sida, endang orang ti arap, endang dikarindu ka sida.

Ajar sida ti ulun orang nundok ka tuan sida; anang nimbal jako, anang ngenchuri, utang mandang ka diri tau dikarap, ngambi ka oih pendiau sida ti manah, Allah Taala, Pnglepas kitai tau dipuji.

* * *

Ko Tuhan Isa : Orang ti ditemu lurus megai utai ti mimik, ka lurus mega megai utai ti mayoh; lalu orang ti enda lurus megai kerja ti mit, enda mega lurus megai kerja ti besai.

Nyadi samoan utai ti dikerja kita, tau ka enggau jako, tau ka enggau pengawa kita, gaga samoan dalam nama Tuhan Isa.

Kolosi 3 : 22-24. 1 Timoti 6 : 2. Titus 2 : 9, 10. Luke 16 : 10. Kolosi 3 : 17.

Jako tampong : Kerja Rasul 18 : 3. 1 Korinth 3 : 9. Epesus 4 : 28.

3. SIDA TI TUAN ENGGAU KAPALA ORANG

Kita ti tuan orang, bri ka anembiaik kita utai ti patut; anang ngakal sida, laban kita nemu kitaempu bisa Tuhan siko di serga. Kita ti tuan orang, anang ngembla anembiaik kita, laban kita nemu, Tuhan sida enggau Tuhan kita bisa di serga; nyadi Tuhan nya enda milih orang.

* * *

Anang kita beduan orang gaji ti umang, ti saranta; tiap hari bayar gaji iya, anang matahari padam sabedau kita mayar iya, laban orang nya sigi umang lalu beguna ka gajii iya.

enggau pemati. Leboh orang angkun ka wang, nya numboh ka mayoh macham penyai; bisi orang ti udah angkun ka nya, ti udah ngelengka ka pengarap, lalu udah bulih mayoh penusah.

Matthew 6 : 19-21, 24. 1 Timoti 6 : 6-10.

Anang irau ati ka utai ti ka nyadi dudi hari

Ko Tuhan Isa : Anang irau ka nyawa kita, nama ti ka di-empa kita, sakalika nama ti ka di-irup kita; anang mega irau ati ka tuboh kita, nama ti ka dikenai kita. Apai kiti ti di serga nemu kita beguna ka samoia utai nya. Dulu giga printah iya enggau penglurus iya, lalu samoia utai nya ka ditambah ka kita.

* * *

Anang irau ati pasal barang utai; utang pasal samoia utai, pinta ari Allah Taala samoia utai ti ka guna kita enggau sampi ti minta enggau sampi puji.

Bai ngagai Allah Taala samoia utai ti ngiroh kita, laban iya ti ngintu kita.

Tuhan Allah ti pengibun aku, umbas utai ti dibri iya ka aku.

Matthew 6 : 25, 32, 33. Pilipai 4 : 6. 1 Peter 5 : 7. Masmur 23 : 1.

Jako tampong : Matthew 19 : 23. Luke 3 : 14. Ibrani 15 : 5. Jakob 2 : 5.

Ingat!

Ko Tuhan Isa : Tagang diriempu, anang angkun ka utai. Uki tegal pemayoh utai ti ka bisi orang ti tau ngidup ka samengat iya. Lalu iya nelah jako bekurong ka sida, ko iya, Utai ti ditanam orang raja siko di kebun iya bebuah lebat bendar, lalu iya berunding dalam ati diri munyi tu, Kat iko aku enggau, laban aku nadai bisi alai nyimpan samoia utai aku. Lalu ko iya, Tu ti ka digaga aku; aku ka ngeruboh ka pelaboh aku, lalu ngaga ti besai agi, lalu dia aku ka nyimpan samoia gamdum enggau kresa aku. Udah nya, laban aku bisi mayoh utai ditaroh ka

betaun-taun, aku ka ngelantang kadiri, makai, ngirup, enggau ngerami kadiri. Utang Allah Taala bejako enggau orang nya, ko iya, Nuan ti bli, malam tu lagi samengat nuan ka di-ambi pulai, lalu samoia utai ti udah ditugong nuan, sapa ti ka bempu iya? Baka nya orang ti nugong utai ka diriempu, utang iya nadai utai ti dikarindu ka ka Allah Taala.

Luke 12 : 15-21.

Jako tampong : Matthew 13 : 7, 22. Luke 6 : 24, 25; 18 : 18-30. Ibrani 13 : 5. Jakob 2 : 1-9; 5 : 1-6.

5. PASAL BERUTANG ENGGAU ANAK DUIT

Anang enda malas utang kita enggau orang; samina siti utang ti enda ulih dibalas kita, nya pengindu orang.

Roma 13 : 8.

Enti orang ti umang nginjau duit ari kita, anang minta anak duit nya ari iya.

Tuhan, sapa ti tau diau di rumah Tuhan? Sapa ti tau diau di bukit nuan ti kudus? Orang ti diau tuchi, ti ngaga utai ti ngena; ti bejako bendar ari ati iya. Orang ti bejali ka wang, enda beranak ka iya; ti enda nyambut suap ari orang ti ngelaban sida ti enda salah. Orang ti ngaga samoia utai nya enda ka dibuai belama-lama.

Orang ti jai nginjau, tang enda tebalas ka iya, tang orang ti lurus, iya nelap, lalu mri utai ka orang.

Exodus 22 : 25. Masmur 15 : 1, 2, 5; 37 : 21.

Jako tampong : 1 Timoti 6 : 6-10, 17,18.

6. PASAL BECHARA

Anang bechara enti bisi jalai bukai ngadu ka laya

Ko jako Tuhan Isa : Leboh kita besambiang, sebut, Ampun penyalah kami, baka kami ngampum samoia orang ti salah ngelaban kami.

Nyadi ko jako Tuhan Allah Taala : Aku ka datai lalu mai kita bechara, lalu akuempu ka ngelaban sida ti ngakal orang gaji dalam pasal gaji iya.

Ko Tuhan Allah mega : Penusah ka ninggang orang nya ti ngambi kerja orang, lalu enggai mri gaji ka iya.

Kolosi 4 : 1. Epesus 6 : 9. Deuteronomy 24 : 14, 15.
Malakai 3 : 5. Jeremaiah 22 : 13, 16.

Tu jalai ti badas agi

Ko Tuhan Isa : Iya ti besai dalam kita, awak ka iya nyadi baka ti biak agi; lalu iya ti kapala kita, nyadi baka orang ti mla kita. Nyadi aku begulai enggau kita baka orang ti mla kita.

* * * *

Awak ka runding ati kita sabaka enggau runding ati Isa Almesih; Nyadi taja iya sabaka enggau Allah Taala, iya enda ngumbai untong nya enda tau ditinggal, utang samoan mulia Petara dilengkah ka iya, baka ai ti dituang ka ambis, lalu iya nyadi baka ulun, iya nyadi mensia amai.

Luke 22 : 26, 27. Pilipai 2 : 5-7.

Jako tampong : Matthew 23 : 10-12. Mark 10 : 42-44
Luke 7 : 2-10. John 13 : 1-17. Pilimon 8-22.

4. PASAL DUIT ENGGAU MODAL KITAI

Kita nenu pengasih Isa Almesih, Tuhan kitai; taja iya raja iya nyadi umang awak ka nulong kita, ngambi ka olik iya umang, kita tau nyadi raja.

2 Korinth 8 : 9.

Pasal Penglurus ati

Anang ngenchuri. Anang angkun ka utai orang.

Anang nginsit pak di tanah orang.

Anang kita enda lurus lebok bechara, lebok beblenggau bejual utai; awak ka takar, penyukat, enggau dachin kita betul amai. Aku tu Allah Taala, Petara kita.

Ko Allah Taala : Orang ti ngator pendiau iya enggau lurus, lalu bejako bebendar, ti enda ngiga untong ari penusah orang, ti enda makai suap, iya ka baka orang ti diau di bukit batu jauh ari pengrusak; enda orang nya ka kurang pemakai, enda kurang ai.

* * *

Enti orang ngenchuri utai, enda tau enda iya malas baru. Enti orang ngelepas ka jelu iya, lalu jelu nya makai kebun orang bukai, enda tau enda iya malas orang nya enggau utai ti manah ari kebun iyaempu. Samoa penyalah ti digaga ngelaban orang bukai enda tau enda dibalas dua lipat.

Ko Sakius enggau Tuhan Isa : Tuhan, satengah samoan utai aku ka dibri aku ka orang ti saranta; enti aku udah enggau enda patut ngambi barang utai orang, aku deka malas empat kali lipat. Ko Tuhan Isa, bejako enggau iya, Saharitu salamat baru udah datai di rumah nuan.

Exodus 20 : 15, 17. Deuteronomy 19 : 14. Leviticus 19 : 35, 36. Isaiah 33 : 15, 16. Exodus 22 : 1, 3, 5, 9. Luke 19 : 8, 9.

Anang angkun ka wang

Ko Tuhan Isa : Anang nungong ka diriempu reta dalam dunya tu, ti alai gegat enggau tegar makai, lalu penchuri ngenchuri; utang tugong ka diriempu reta kita di serga, dia nadai gegat nadai tegar makai, lalu penchuri enda ngenchuri. Nyadi di endor reta kita diau, dia mega ati kita ka diau. Kita enda tau betuai ka Allah Taala serta enggau betuai ka pengraja.

Ko jako Rasul St. Paul ngajar kitai : Enti orang nangi ka Allah Taala, nya untong besai, enti orang lantang ati enggau utai ti ka bisi iya. Kitai nadai mai utai kadalam dunya tu, nadai mega kitai tau mai barang utai pulai ari dunya. Utang enti bisi pemakai enggau gari, nya meh umbas ka kitai. Orang ti kran ka nyadi raja kena penguji besai, kena akal enggau mayoh ingin ti ngapa, ti nganu, ti ngelamas ka sida dalam pengrusak

Ko iya mega : Enti menyadi nuan udah bepenyalah ngelaban nuan, gosong iya kadiri, lalu madah ka iya penyalah iya. Nyadi enti iya ninga ka nuan, nuan udah bulih menyadi nuan, utang enti iya enda ninga ka nuan, bai enggau nuan siko dua orang, ngambi ka ari nyawa dua sakalika tiga iko saksi, tiap leka jako nuan tau ditentu ka. Nyadi enti iya enggai ninga ka sida, padah ka eklesia. Enti iya enggai mega ninga ka eklesia, awak ka iya baka orang petang ti enda arap ka Allah Taala.

Ko iya mega : Enti menyadi nuan salah, anu iya; enti iya ngesal ati, ampun iya. Enti iya salah ngelaban nuan tujoh kali dalam sahari, lalu tujoh kali ngadap nuan, ko iya, Aku ngesal ati; enda tau enda nuan ngampun iya.

* * * *

Rasul St. Paul ngajar kitai, ko iya : Enti kita bisi laya enggau orang bukai, kati enda kita takut ngasoh orang ti ukai Kristian bechara ka kita, lalu enda ngasoh anembiak Allah Taala? Kati nadai kita nemu siko ti bepenemu ari kita ti tau ngadu ka leman menyadi iya? Utang menyadi ngelaban menyadi bechara, tambah'ga minta adu ka orang ti enda arap. Tu salah bendar ti digaga kita, kita bisi pechara enggau diri sama diri. Lapa enda nat ka orang ti ngachau kita? Lapa enda nat ka orang ti ngambi utai kita?

Luke 11 : 2, 4. Matthew 18 : 15-17. Luke 17 : 3, 4.
1 Korinth 6 : 1, 5-7.

Joko tampong : Galatia 6 : 1.

Jalai ngadu ka laya enggau bechara

Ko jako Tuhan Isa : Enti barang orang ka mai nuan bechara lalu ka ngambi baju nuan, bri ka iya mega pua nuan.

Anang nyadi saksi bula ngelaban orang.

Leboh bechara, bechara enggau lurus, anang milih orang; dinga jako orang umang sabaki enggau orang kaya. Anang takut ka barang orang; Tuhan Allah ti megai pechara.

Matthew 5 : 40. Exodus 20 : 16. Deuteronomy 1 : 17.
Joko tampong : Matthew 6 : 14, 15.

7. PASAL ORANG TI NGELABAN KITAI

Nyadi orang ngeregang Tuhan Isa. Ko iya, Apai, ampun sida tu, laban sida enda mereti utai ti dikerja sida.

Luke 23 : 33, 34.

Ko Tuhan Isa : Rindu ka sida munsoh kita; gaga kerja ti badas ka sida ti begedi ati di kita; minta berkat ka sida ti nyumpah kita; besambiang ka sida ti jai enggau kita. Iya ti nampar nuan di kuyu sapiak, sua ka iya kuyu sapiak mega.

Agi mega jako tu : Beberkat sida ti ngemadu ka laya orang; laban sida ka dikumbai anak Allah Taala.

* * * *

Rasul St. Peter udah nulis munyi tu : Nyadi Almesih udah marinisa tegal kita; iya ngaga teladan ka kita, ngambi ka kita tau niteh ka iya. Leboh orang bejako nganu iya, iya enda malas nganu orang. Leboh iya marinisa iya enda madah ka diri ka malas, tang iya arap ka Siko nya ti mutus ka pechara enggau lurus.

Ko jako Rasul St. Paul mega : Anang malas penyai orang enggau penyai. Enti kita tau, naka ulih, diau bebaik enggau samoza orang. Anang kitaempu malas, utang awak ka Allah Taala nganu orang; laban udah ditulis munyi tu : Aku ka malas, ko Tuhan Allah. Nyadi enti munsoh nuan lapar, bri iya makai; enti iya aus, bri iya ngirup. Anang kita alah laban penyai, tang ngalah ka penyai orang olik pemadas kita.

Anang andal leboh munsoh kita alah; anang gaga leboh iya rebah. Anang bejako munyi tu : Aku ka ngaga enggau iya baka iya udah ngaga enggau aku; aku ka malas iya nunda ka kerja iya.

Enti nuan nemu jelu munsoh nuan ti udah nyau, enda tau enda nuan nganjong iya pulai ngagai iya. Enti nuan meda keldai munsoh nuan rebah laban utai brat ti dima iya, enda tau enda nuan nulong iya, taja ati nuan ka enggai.

Luke 6 : 27-29. Matthew 5 : 9. 1 Peter 2 : 21, 23.
Roma 12 : 17-21. Proverbs 24 : 17, 29. Exodus 23 : 4, 5.

Joko tampong : Kerja Rasul 7 : 54-60. 1 Korinth 13.

8. PASAL KASIH KA ORANG ENGGAU MLA ORANG

Kasih ka orang baka tu

Tu jako Tuhan Isa : Enggau nadai bebayar kita udah nyambut ari Allah Taala, enggau nadai bebayar mega kita patut mri ka orang. Nyadi leboh nuan mai orang makai anang ngumbai sida ti pangan nuan, sakalika ka sida menyadi, sakalika sida suku juru, sakalika sida ti raja, enggai ka sida nya ngambi nuan ngabang, lalu nuan kena balas. Utang ambi sida ti saranti, sida ti puntul kaki, ti timpang, ti buta, lalu nuan ka bulih berkat, laban sida nya nadai bisa utai enggau malas nuan. Nuan ka kena balas leboh pengankat sida orang ti lurus ari mati.

Matthew 10 : 8. Luke 14 : 12-14.

Jako tampong : 2 Korinth 9 : 6, 7. Matthew 6 : 1-4

Pasal mri ka Allah Taala

Samoa pirak enggau samoa mas, sigi enggi aku, ko Tuhan Allah Taala.

Nyadi sida anembiak Allah Taala enda tau datai ngagai iya puang; tiap orang ka mri utai nunda ka pemisi iya, nunda ka pemayoh utai ti udah dibri Petara ka iya.

Nyadi sakali Isa tepeda ka orang ti raja ngengkah ka wang sadekah sida kadalam peti wang. Lalu iya tepeda ka siko indu ti balu ngengkah ka dua duit kadalam nya mega. Udah nya, ko Tuhan, Aku madah ka kita, indu tu ti balu, ti saranta, mri mayoh agi ari samoia sida, laban samoia sida nya udah mri sadekah ari duit sida ti mayoh, utang indu tu ti nadai utai udah mri samoia ti ka bisi iya, samoia pengidup iya.

Haggai 2 : 8. Deuteronomy 16 : 16, 17. Luke 21 : 1-4.

Allah Taala merkat ka orang ti mri

Tu jako St. Paul : Dalam samoia utai aku nyadi teladan ka kita, madah ka kita patut bekerja baka nya lalu nulong orang ti enda kring, lalu ingat ka jako

Tuhan Isa, munyi tu, Orang ti mri, beberkat agi ari orang ti nyambut.

Bai samoia utai ti patut ngagai rumah aku, ko Tuhan Allah, lalu aku ka muka pintu serga lalu nuang berkat datas nuan, datai ka nuan nadai umbas alai nyimpan samoia iya.

Bisi orang ti mri, lalu kresa iya nambah-menambah; bisi orang ti naroh nya ti patut dibri iya, lalu kresa iya mansang kurang. Orang ti kasih ka bulih pengasih, orang ti manjah enggau ai, iyaempu ka kena panjahan.

Enjok ka orang, lalu ka di-enjok ka kita takar ti badas, ti dipajak, ti digusak, ti nyau belaloh laboh, ka dibri orang ka kita; laban enggau takar nya kita nakar, pia mega ka ditakar ka kita baru.

Jerka Rasul 20 : 35. Malakai 3 : 10. Proverbs 11 : 24, 25. Luke 6 : 38.

Jako tampong : 1 Korinth 13 : 3. Matthew 6 : 1-4. 2 Korinth 8 : 1-12. Matthew 25 : 31-40.

9. LEBOH KENA KEDUAN TEGAL PENGLURUS KITA

Tuhan Isa ti teladan kitai

Ko Tuhan Isa : Anembiak enda besai agi ari Tuan iya. Enti orang udah beduan aku, tentu sida ka beduan kita.

Iya kena keduan, tang enggau ati baroh iya diau diri,

Iya enggai nimbal jako orang;

Baka anak domba ti disembilih enda memunyi,

Baka domba ti dikempat bulu enda ngelaban,

Baka nya mega iyaempu nat ka diri.

Iya dibunoh orang enggau nadai patut,

Tang sapa ti iboh ka kerja nya ?

Iya dibuai ari tengah orang ti agi idup,

Iya mati ka tegal dosa kitai.

Iya ditumbak begulai enggau orang ti bedosa,
Iya sama sapendam enggau orang ti jai,
Taja iyaempu enda ngerja penyai,
Jako iya enda kala ngakal orang.

* * *

Ko Tuhan Isa ngajar murid iya : Orang ka nangkap kita lalu ka beduan kita, lalu nutup kita tegal nama aku. Samoa kerja nya ka nyadi awak ka ngamai ka jako aku. Utang anang kakang, anang berunding dulu baka ni kita ka nyaut, laban aku ka mri ka kita jako enggau penemu; nyadi samoan munsoh kita enda telaban, enda tejap ka kita. Laban ukai kita ti bejako, tang Roh Apai ti bejako dalam kita. Anang kita takut ka mensia ti munoh tuboh, tang sida enda tebunoh ka samengat : utang takut ka iya ti tau ngerusak samengat enggau tuboh mega dalam api neraka (iya nya Allah Taala).

Ko Tuhan mega : Beberkat samoan orang ti kena keduan tegal penglurus, laban sida ka bempu printah serga. Beberkat kita lebok orang nganu kita, lalu beduan kita, lalu nempa ka samoan macham penyai pasal kita, laban kita murid aku. Andal, lalu gaga bendar kita, laban besai bendar upah kita di serga. Nyadi baka nya orang ti udah beduan sida nabi ti dulu ari kita. Nyadi samoan orang ka begedi ati di kita tegal nama aku : utang iya ti ngenat ka diri datai ka di ujung ka di-idup ka.

Minta berkat ka orang ti beduan kita; minta berkat, anang nyumpah sida.

* * *

Ko Rasul St. Peter : Beberkat kita enti kita kena bantah tegal nama Almesih, laban Roh Allah Taala diau datas kita. Utang anang barang kita marinisa laban iya munoh orang, tau ka ngenchuri, tau ka ngerja utai jai, tau ka ngachau utai orang; utang enti orang marinisa laban iya orang Kristian, anang iya malu, tang awak ka iya muji Allah Taala laban iya niteh ka jalai nya.

Nyadi tu jako Rasul St. Paul : Kuasa aku umbas ka nuan (ko Tuhan Isa), laban kuasa aku trang ditemu orang lebok iyaempu lemi . . . nya alai aku gaga lebok aku lemi, lebok orang beduan aku, lebok aku tusah, lebok orang marinisa ka aku; laban maia aku lemi, maia nya aku dikring ka mega.

Ko Tuhan Isa : Utai tu udah ditusi aku ka kita ngambi ka kita bulih penyamai oih aku : di dunya tu kita nemu penusah, utai kring ka ati kita, laban aku udah ngalah ka dunya.

John 15 : 20. Isaiah 53 : 7-9. Luke 21 : 12-15.
Matthew 10 : 20, 28; 5 : 10-12; 10 : 22. Roma 12 : 14.
1 Peter 4 : 14-16. 2 Korinth 12 : 9, 10. John 16 : 33.

Jako tampong : Pilipai 1 : 29. Kerja Rasul 4 : 1-31.

JALAI ALLAH TAALA

i. JALAI BETUAI KA IYA ENGGAU NYEMBAH IYA

Allah Taala endang Roh; orang ti nyembah iya enda tau enda besembah enggau roh enggau pemendar.

* * *

Piring ti dikarindu ka Allah Taala, nya ati ti runtoh; ati ti tusah, ti ngesal ka penyalah, enda dipechat ka Tuhan Allah.

* * *

Awak ka kitai salalu ngenjok ka piring puji ka Allah Taala (oli Isa Almesih), iya nya utai ti ditelah nyawa kitai, ti madah ka diri arap ka iya.

* * *

Anang kita enda ingat ngerja utai ti badas, lalu magi utai enggau orang, laban Allah Taala rindu ka piring ti baka nya.

* * *

Pengarap ti bendar, ti nadai digulai jai di moa Allah Taala, ti Petara, to Apai kitai, tu meh iya : ngabas orang patu enggau orang balu dalam penusuh sida, lalu ngintu diri tuchi ari penyai dunya.

John 4 : 24. Masmur 51 : 17. Ibrani 13 : 15, 16. Jakob 1 : 27.

Jako tampong : Roma 12 : 1, 2.

2. PASAL NGINTU HARI MINGGU

Ko Tuhan Allah Taala : Ingat ka Hari Minggu, intu hari nya tuchi.

Nyadi Allah Taala merkat ka hari ti ka tujoh, lalu nudus ka iya, laban nya hari iya ngetu ari samoan pengawa iya.

* * *

Enti nuan ka ngintu hari minggu, enda begawa; lalu rindu ka hari nya lalu bebas ka iya; lalu ngetu ari kerja diri, lalu enda ngerami kadiri hari nya, lalu enda berunding ka jako mensia; udah nya ati nuan ka lantang berunding ka Petara nuan; lalu iya ka ngasoh nuan diau di menoh enggau ati nyami.

Nyadi Isa, nunda ka adat iya, tama kadalam rumah sambiang lebok Hari Sabtu lalu bediri macha surat Allah Taala.

Ko Tuhan Isa : Patut kita ngerja utai ti badas lebok Hari Sabtu.

Nyau lemari Hari Minggu, Isa datai lalu bediri di tengah sida, lalu madah ka sida murid iya, Salamat diau enggau kita.

Tu ajar St. Paul : Tiap hari minggu awak ka siko-siko kita naroh duit sadekah, nunda ka utai ti ka bisi iya.

Nyadi hari minggu lebok kami begempuru ka makai roti sakramen, Paul ngajar kami.

Exodus 20 : 8. Genesis 2 : 3. Isaiah 58 : 13, 14. Luke 4 : 16. Matthew 12 : 12. John 20 : 19. 1 Korinth 16 : 2. Kerja Rasul 20 : 7.

Jako tampong : Mark 1 : 21-34. Luke 13 : 10-17. Revelation 1 : 9, 10.

3. PASAL NYEMBAH BERALA

Ko Tuhan Allah Taala : Anang ngaga engkramba; anang nyembah iya, anang betuai ka iya.

* * *

Ko jako Tuhan Isa : Nuan ka nyembah Allah Taala, Petara nuan, ti Siko aja.

* * *

Ko jako St. Paul : Anang kitai ngumbai Petara kitai siga baka mas enggau pirak enggau batu, utai ti di-ukir oleh akal enggau penemu mensia.

Nyadi Allah Taala enda iboh ka runding ti baka nya lebok mensia nadai penemu; utang diatu iya ngasoh samoan orang di sabarang endor berubah ati.

Nyadi utai ti dipiring sida ti ukai Kristian, sida miring ka antu, ukai ka Allah Taala.

Berala ti disembah orang petang digaga ari pirak enggau mas aja; utai ti digaga jari mensia. Mulut iya bisi, tang bejako enda tau; pending iya bisi, tang ninga enda tau; nadai mega bisi seput dalam tuboh sida. Nyadi orang ti ngaga berala ka nyadi sabaka enggau sida; amai, samoa orang ti arap ka sida.

Nyadi sida ti nyadi manang, ti nyembah berala, tu bagi sida, sida ka masok danau nya ti beapi, ti mau laban mirirang.

Nyadi kitai (orang Kristian) siga baka grijah Allah Taala ti endang idup; munyi jako Allah Taala, ko iya, Aku ka diau dalam sida, aku ka begulai enggau sida; Aku ka nyadi Petara sida, lalu sida ka nyadi anembiak aku. Nya alai ko iya, Pansut kita ari sida ti jai; beserara enggau sida; anang megai utai ti enda tuchi. Nyadi aku ka nyadi Apai kita, nyadi kita ka nyadi anak aku.

Exodus 20 : 4, 5. Matthew 4 : 10. Kerja Rasul 17 : 29, 30. 1 Korinth 10 : 20. Masmur 135 : 15-18. Revelation 21 : 8. 2 Korinth 6 : 16-18.

Jako tampong : Kerja Rasul 19 : 23-41. Revelation 22 : 14, 15.

Tu jako Allah Taala : Anang ngasoh orang ngakal kita olih jako ti bula; anang arap ka mimpi ti ditusi sida, laban sida sigi orang pengakal; ukai aku ti ngajar sida.

Sida Jacob nadai beguna ka kerja beburong; sida Israel nadai beguna ka kerja bemanang.

Jako Allah Taala pasal kerja nya tadi

Anang kita arap ka manang; anang kita beburong; anang ngamah diri enggau kerja ti baka nya; laban aku tu ti Petara kita. Nyadi aku ka ngalih ka moa aku ari orang ti bemanang, lalu enda agi ngaum iya enggau sida ti anembiak aku.

Nyadi Saul mati, laban iya enda arap ka Allah Taala, laban iya enda niteh ka jako iya, laban iya minta ajar manang, enda minta ari Allah Taala; nya alai Petara ngambi samengat iya lalu mri printah iya ngagai David anak Jessi.

Zechariah 10 : 2. Jerimaiyah 29 : 8, 9. Numbers 23 : 23. Leviticus 19 : 31; 20 : 6. 1 Chronicles 10 : 13, 14.

Jako tampong : Kerja Rasul 8 : 9-24; 13 : 4-12; 19 : 8-20. Kolosi 2 : 15.

4. PASAL MANANG ENGGAU ORANG TI NGAKAL

Anang arap ka jako antu; anang arap ka utai ti ditusi manang; sida nya bula, lalu enda tau ngelantang ka ati kita.

JAKO TI DUDI

PEMATI—IYA NYA PUN JALAI TI NUJU PENGIDUP TI MERUAN

Jadi meh peneka Allah Taala

Udah Tuhan Isa pulai idup baru ari mati iya bejako munyi tu : Anang takut; aku iya ti dulu, iya ti dudi mega, enggau iya ti endang idup. Nyadi aku udah mati, lalu peda, aku idup belama-lama, lalu aku bisa kunchi pemati.

* * *

Tuhan Allah ti mri, Tuhan Allah ti ngambi pulai; beberkat nama Tuhan Allah.

Almesih udah ngalah ka pemati

Nyadi Allah Taala udah ngelepas ka iya ari pemanisna pemati, laban iya enda tau diprintah nya.

Nyadi Isa Almesih, Pengelepas kitai, udah ngalah ka pemati, lalu udah ngasoh kitai nemu pengidup ti meruan, oih injil ti ditusui iya.

Kitai tau menang oih kuasa Almesih

Ko Tuhan Isa : Aku tu pengangkat orang ari mati, enggau pun pengidup; barang orang ti arap kaaku, taja iya mati, udah nya iya ka idup baru; lalu barang sapa ti idup lalu arap kaaku, enda iya ka mati belama-lama.

Pemati udah alah oih kuasa iya ti menang; dini pemenang nuan, pemati? Dini pemedis nuan, pemati? Pemedis pemati nya dosa; utang puji dibri ka Allah Taala ti mai kitai menang oih Isa Almesih, Tuhan kitai.

Kitai ka diau enggau Tuhan kita belama-lama

Anang kita tusah ati, baka orang ti nadai utai ti di-adang. Laban enti kitai arap ka Tuhan Isa udah mati lalu angkat pulai idup baru, baka nya mega Allah Taala ka ngankat baru enggau Isa sida ti udah mati

ti udah arap ka iya. Laban Tuhan iyaempu ka nurun ari serga enggau penjong, enggau nyawa kapala malikat, enggau trumpit Allah Taala; nyadi orang Kristian ti udah mati ka dulu angkat; udah nya kitai ti agi idup ka ditanggong ka atas enggau sida dalam remang, ka betemu enggau Tuhan di langit, nyadi baka nya kitai ka begulai enggau Tuhan belama-lama.

Laban aku tentu nemu dalam ati diriempu, tau ka pemati, tau ka pengidup, tau ka malikat, tau ka bala serga, tau ka utai ti diatu, tau ka utai ti ka nyadi dudi, tau ka barang kuasa, tau ka utai ti tinggi, tau ka utai ti dalam, tau ka barang utai bukai ti digaga, enda tau nyerara kitai ari pengrindu Allah Taala, ti ditemu kitai oih Isa Almesih Tuhan kitai.

Leboh aku nurun nengah darong pemati,
enda aku takut ka pengrusak,
laban nuan, Tuhan, bisa enggau aku;
Tungkat ti dipegai Tuhan ngasoh aku lantang.

Revelation 1 : 17, 18. Job 1 : 21. Kerja Rasul 2 : 24.
2 Timoti 1 : 10. John 11 : 25, 26. 1 Korinth 15 : 54-57.
1 Tessalonika 4 : 13, 14, 16, 17. Roma 8 : 38, 39. Masmur
23 : 4.

Jako tampong : 1 Korinth 15 : 20, 22. John 11 : 1-44;
8 : 51. 2 Korinth 5 : 1, 6, 8.

Jalai Ngator Pendiau

JAKO AJAR ARI SURAT ALLAH TAALA

*Baka iya ti udah ngumbai kita endang tuchi;
baka nya mega kitaempu patut ngator samo
pendiau kita awak ka kita diau tuchi.*

1 Peter 1 : 15.

*Aku ka mandang ka salamat Allah Taala
ngagai orang ti ngator pendiau iya betuku.*

Masmur 50 : 23.

*Nunda ka pemanjai umor nuan,
kuasa ka dibri ka nuan.*

Deuteronomy 33 : 25.

*Awak ka Pendiau kita baka ti patut ka orang ti
arap ka Injil ti ditusi Isa Almesih.*

Pilipai 1 : 27.



Scripture Gift Mission
ECCLESTON STREET, LONDON, S.W.1

Printed in England